



蘆中集卷九

起甲戌五月  
盡十二月

太倉王攄虹友著

渡錢塘

羅刹江頭水茫茫似鏡澄天長看鳥去山迥見雲  
蒸榻憶懸徐穉舟欣共李膺謂朱立雲舊遊難遽別煙  
樹又西興

玉山道中

數聲聞款乃起望曉濛濛微覺渚烟合遠看山翠  
空蟾蜍下西嶺舴艋犯南風歸思隨流水嚴灘東  
更東

望靈山

靈山何瓌異作鎮雄一方峰有七十二峰勢軒  
翔昨從籃輿上一見驚非常今朝蓬底坐尤得觀  
其詳昔登天都頂暫憇丹臺旁驅車岱宗下日觀  
遙相望狀候俄頃變嘘吸成陰陽與茲若相較氣  
象無低昂國家崇祀典秩宜視侯王豈其淪下邑  
名位乃弗彰古來賢達士類多岩穴藏匪必富材  
藝然後登廟堂山靈亦如此失職非所當虔以薦  
牲醴神兮應降祥我爲再三歎目瞠心徬徨何時  
踞其巔一覽窮扶桑

過廣信

聞道頻憂旱今年亦盡耕舟前亂山影城上遠灘  
聲地瘠民雖困時清盜不生饑驅非得已且免客  
心驚

弋陽曉發用杜早發韻

連朝火傘張毒熱我所病遲暮胡勞勞吾生賤貧  
併慎毋懟祝融時今斯爲正順逆安其恒達人貴  
知命殘月女牆明長林互虧映舟行貪早涼倦僕  
呼未醒急啟篷窓觀川平拭如鏡一葉犯雲濤所  
愁南風盛身外付黑甜眼前愛綠淨聯翩白鳥飛

物亦遂天性何苦累猪肝席珍慙待聘功成退乃  
常乞解炎官柄

篠箬塘

篠箬塘邊路人行似鏡中有灘鳴斷岸無岫入高  
空鷗泛縱橫水蟬吟斷續風居然惠崇畫此景是  
江東

過安仁縣用劉隨州登餘干故城韻

千章夏木綠陰齊日日舟行盡向西傍岸水花紅  
自落當窓山鳥翠還啼夢中黯黯吳雲杳望裏蒼  
蒼楚岫低聞道此鄉稱沃壤孤城斗大在前溪

中途述懷寄故園諸兄弟十六韻

爭笑遭逢老益屯自憐友愛晚逾敦行行豈不思  
鄉井黯黯尤難別弟昆從此風帆兼浪舶飄然越  
角及吳根橫空岩勢長蛇巨吼雪灘聲渴驥奔小  
市人稀魚蟹賤空山日暗虎狼尊旬餘屢換江邊  
棹秋近將行嶺上邨三伏炎蒸方盛夏六時焦爛  
少逃門脂流僅免燃郿塢風怒何殊火陸渾人事  
天時愁併至離家去國恨難論扁舟幸得偕同調  
遠道差能慰旅魂險韻分時驪共探雄談劇處虱  
常捫浮雲東望鄉關杳危嶠南遊瘴癘昏入幕或

懸徐穉榻開筵應醉孔融樽縱教鄭驛能留客終  
愛於陵老灌園來日攀條江柳暗歸時舒萼嶺梅  
繁因風爲語姜肱被畱待春寒好共溫

望彭蠡湖

鳴榔湖尾過浩浩水無邊白捲千堆雪青浮幾點  
煙半分江海勢不辨楚吳天歸日風帆挂匡廬在  
眼前

過南昌用韋莊晚眺韻

中流兩岸見炊煙城外樓臺水接天楚望眼窮西  
嶺日吳歌心逐下江舩平川淼淼晴飛鷺灌木陰

陰晚噪蟬風利孤帆無泊處滕王高閣倚雲邊

泊豐城疊前韻

曲江亭子枕荒煙城對青山是楚天長隱劍芒龍  
入水初生月魄兔明船老應倦羽慙歸鳥閒正清  
吟侶暮蟬相伴蒹葭洲渚宿一竿心憶五湖邊

泊新淦因傷周東岡

江帆落暮天郭外景澄鮮星月浮諸浦峰巒集一  
船故人曾宦此過客重悽然不用山陽笛臨風涕  
泗連

峽江曉發

曉色江如練薰風曳曳生沙頭灘逆上林下壁孤  
撐鳥語幽篁碎魚游亂石明釣臺人盡望疑入富  
春行

### 釣魚臺

長松倚巉岩明月生廣澤不知釣者誰心憶羊裘  
客

### 泊三家灘

飛鳥去不息衆山明夕曛洲前帆盡落巖際路微  
分野濶天低樹江空月破雲角聲終夜語愁絕客  
中聞

### 過吉水疊前韻

我欲停橈望朝暎到夕曛淨惟林壑映曠有水天  
分谷暗孤城樹川明傑閣雲江流成自在身歷信

傳聞

相傳水紋  
成吉字

### 快閣用黃山谷韻

閣在  
城上

快閣登臨窮遠目清秋欄檻最宜晴全收風月孤  
城得獨攬溪山兩岸明高樹綠遮漁網集遙村青  
颭酒旗橫倦遊意緒真無賴于此堪尋物外盟

### 阻風寫悶

眼前咫尺虔州山夢遊於此將十年八境高臺古

城上鬱孤未共淪荒煙先春大廈梅花發西接五  
嶺青連綿雄州南下抵韶石昔聞虞舜奏樂還是  
皆江山最佳處願乘飈輪至其間胡爲石尤苦留  
滯千艘不發螺江邊昨朝噫氣片時耳謂乖常度  
陰陽愆山鳴海沸晝復夜哮怒不息何軒軒鼉鼉  
出沒百怪集其下若有天吳掀自笑平生忙爲口  
此時嶺南荔子丹水晶盤薦頰虬卵日噉三百我  
所歡恐遇秋風便涼泠流涎滿口終緣慳無生擾  
擾未能曉鬢髮變盡成霜顛神珠必由智者得維  
摩詎可終無言六祖道場南華寺去遊一問曹溪

禪觸熱南來緣底事篷窓兀坐開帆難男子桑蓬  
志不淺橫遭羈束誠迤邐阿童伐吳師東下風利  
不泊三山船或者將相天所佑利鈍自與人相懸  
子安三寸弄柔翰馬當風送扁舟前滕王閣上驚  
四座于我亦是殊天淵乃知生物不一轍栽培傾  
覆恒多偏故園松菊幸無恙日高三竿猶晏眠唱  
酬花下有兄弟豈不心懷筮與墳蓬頭歷齒王霸  
子亦自舐犢欣團圞淹泊長途行未半誰能輕以  
歸期論茲豈飛廉妄作虐皇天有意窮儒酸初疑  
造化失其柄龍魚鼠虎容有然妖墓食月磔以死

下臣天位孰敢奸帝若不遣巫陽下將叩九閭訴  
銜冤

思食芡

芡是江鄉物思嘗在客途性微同薏苡香或勝彫  
菰採出銀塘美盛來玉盃須天南如見此應道浦  
還珠

舟行用杜次空靈岸韻

繫舻昏晝眠放舟恣晴眺昨憂風浪危今賞江山  
妙空水混一碧煙雲出羣峭暮齒皇天哀微誠白  
日照月峽猿屢啼風岩虎頻嘯遙遙違故鄉去去

歷蠻徼游覽我自怡馳驅人或謂蕭然環堵居養  
拙斯爲要

食薤菜

吾聞諸楚詞落英餐秋菊又聞馬伏波薏苡辟瘴  
毒凡爲雨露濡其性皆清淑水薤葉青青大都藜  
苳屬內熱且無愁食之療炎燬雖未堪金盤珍羞  
薦華屋猶然勝朱門狼藉臭酒肉長此供朝晡粗  
飯我亦足況求老病除豈必窮口腹果與養生宜  
黃精不須斲

盧壘灣



盤渦蹴浪紋虎嘯隔岩聞上有浮圖在孤撐一握雲

月

一片家山月今看在萬安幾年隨客路竟夕照江  
千如水明孤舫先人上惡灘回思別家日兩度見  
團圓

聞絡緯

客夜初聞此鄉心感候蟲爲誰鳴月下獨自聽舟  
中滾滾沙間浪蕭蕭葉上風夢歸殊未得愁聒耳  
將聾

十八灘

青擁萬安城連山駕鰲背舟行吼若雷聒耳聞驚  
瀨發軔自黃公諸灘斯爲最灘灘狀各殊殷地聲  
一槩巨石劍戟攢往來舳艫礙篙工偶一失莫可  
救顛沛險孰與之方庶幾瞿唐配沉沉水府開窟  
穴蛟龍會倘燃牛渚犀下可燭百怪恨乏愚公術  
移之置天外不然強弩千以射風濤退奚爲履險  
行出入罔知戒迄今奏平成益覩禹功在奇景覽  
自佳畏途行已憊將盡天柱臨洶涌勢尤大悔不  
治粵裝安危問諸蔡

立秋

沙邊櫓急過灘舟  
令節初逢大火流  
白髮天涯新楚客  
青山江上古虔州  
雲生斜漢微微夜  
風颭孤帆颯颯秋  
屈指穿針時又近  
心懷兒女故園樓

由贛之潮州

虔州城下是通津  
南去雲山與粵鄰  
雀舫風濤行贛石  
鯉溪祠廟問潮人  
秋驚白雁鄉書杳  
老畏黃茅瘴色親  
回首西江烟月在  
明從規外視星辰

興國道中

贛石由來險湯湯  
自古今兩餘江忽漲  
雲際峽常

陰水滙雙流下山連五嶺深  
思鄉應下淚不待聽

猿吟

其地多猿

進灘見石甚奇却賦

石自縱橫布江微曲折  
通波心凌噴薄山骨斷  
玲瓏如馬妨舟楫成雷鬪  
水風茲非魚復浦想見陣  
圖雄

會昌峽

昨過十八灘灘險而壯  
夾岸皆青山山形頗平  
曠放舟虔之南時值江  
新漲千里瀉洪濤一葉  
隨下上進灘見益奇怪  
石難名狀波面縱復橫  
舟行

若穿壙光潤玉玲瓏可移貯盆盎一與風水遭蛟  
龍仍崛強入峽摩穹蒼孱顏立百丈兩壁對削成  
江流束不放仰視天無多雙丸巧爲障上撐無盡  
雲下砥不測浪予也愜平生行行屢回望天或憫  
窮途山靈遣相貺此去五羊還芒鞋尚無恙不求  
陸賈裝願策盧敖杖

會昌瀧

水石衝撞進艇難直如平地上巘岈近南只道天  
無雪捲向濤頭十丈寒

過會昌

汭流旋復折始過會昌城灘盡似猶怒山多如不  
行雙眸看已倦一日險頻驚惆悵人南去西江月  
自明

雨

蕭蕭來枕上不寐聽分明遠客千山外孤篷一夜  
聲重憂炎嶠濕難望漏天晴願掃諸峰淨浮雲蔽  
不生

蟋蟀

蟋蟀知時候羈人感最深每停江上棹不住草間  
吟悲壯三秋氣飛騰百戰心客遊燕趙久爾或遇

知音

羅田山色絕佳爲風雨所蔽志悵

山色羅田勝乍逢碎分縷脉繡重重見時黃帽頻  
呼問歸日青鞋準擬從江上飛雲來片雨舟中晴  
翠失諸峰天公此福猶難予借展圖經興亦慵

萬丈石

昨過會昌峽嘖嘖賞竒詭今觀萬丈石氣象尤雄  
峙初驚拔地生又若凌空起或含曉霧青或映夕  
陽紫遙睇如嶽蓮其旁無一蕊近瞻鱗爪張庶以  
龍蟠擬尉陀昔稱制漫山皆戰壘中可藏千人一

橋險足恃地鄰閩粵間門戶斯爲倚迄今已時清  
盡人皆負耒自從贛南來輒見佳山水造物閔靈  
竒大觀乃在此痼疾烟霞深縱遊寧弗喜賞心何  
終窮一覽亦可已藉以寫相思急呼管城子

由軍門嶺山行

籃輿一徑入烟蘿花笑深岩鳥解歌行盡楚江千  
頃練望來粵嶠百層螺飄零遠道愁鳶跼寂寞閒  
門念雀羅飽歷崎嶇吾不厭知名山水嶺南多  
七夕飲程鄉曹九咸署中

京洛分攜又幾春天涯欵曲意彌親忽驚嶺外逢

佳節却喜尊前共故人夜靜樓臺涼似水秋高河漢澹如銀他鄉也有今宵樂不信飄零瘴海濱

望陰那山

勝絕聞名自故園蓬窓今見欲銷魂灘驚鼉吼難通楫寺憶螺旋不到門三柏霜皮忘歲月古柏三株相傳為慙

師手植

五峰雲氣變朝昏

山有五指峰

夢中或許遊天姥悵望

青冥竦處尊

曹九咸招同李瞻航藍公漪金子翔杜錦

來張魯黻朱立雲飲湖山

賢主邀賓綺席開應劉滿座不凡才簷前樹古濃

陰合亭外山多遠翠來湖接東西憑極目雨逢今  
舊共啣杯此時勝絕忘羈旅欲緩歸心待嶺梅

謁韓文公祠

步出潮東門乃是韓公祠韓江在其下終古流如  
斯山更有韓木昔為虬龍枝邦人感德深名總以  
韓為時維仲秋月習習涼颼吹擷取溪毛薦肅雍  
拜堦墀袍笏光照耀舉頭不敢窺趙陳二公侍配  
食蓋所宜一以鱷魚戮一為潮人師緬昔憲宗朝  
皇綱猶未移藩鎮多跋扈翦除靡子遺孰謂中葉  
後遂無英武姿上表諫佛骨良由忠義持批鱗雖

可罪胡棄天之陞觀其議伐蔡執政莫肯隨惟斷  
功乃成斯言等著龜詔撫鎮州亂舉朝皆危之疾  
馳諭順逆束手聽指麾身未一日安朝廷實多裨  
平生所爲文恒與道相維藉文以傳道厥功萬古  
垂匹夫師百世幾欲侔宣尼詎若荀與楊大醇而  
小疵讀公遺文者趨向無他岐異學任詭雜誰能  
或磷淄靈兮來帝旁縹緲雲龍騎生爲賢與哲沒  
爲神與祇長跪申薄衷公其鑒蕪詞

登鳳凰臺

潮州城外鳳凰臺名勝天南亦壯哉雲霧低從平

地起軒窓遙在半空開鎔銀百頃長湖出分繡千  
重遠岫來欲賦未能愁又別蠻人舟上首頻回

鐵漢樓

巍巍城上樓乃祀元城作在昔元城公立朝殊謬  
諤憶當元祐時僉壬滿臺閣公遊涑水門肯負平  
生學憤切效鷹鷂蔡章膽爲落但求君側清九死  
亦不惡投荒瘴癘鄉慷慨無退却百折荷生還英  
風振寥廓坡公鐵漢稱允矣夫何忤事去千年餘  
流傳尚如昨非若宋祚移山河成寂寞青史無斯  
人褒誅竟安托

中秋夜九咸招同公漪立雲署中玩月即以留別用東坡和子由韻

長空雲淨月出高星河盡掩無一毫浩浩金波流  
不定天風萬里吹海濤灌園本是於陵子南泛扁  
舟渡瀧水美人愛客贈琅玕來暮歌謠境中起山  
間孤城如彈丸龍川明去看龍蟠有酒且盡今宵  
樂自驚身在瑤臺寒去年此時將之汴不因南北  
歡娛變古云行樂貴及時胡獨一官勞手板驪駒  
忽唱誰能前感君用心金石堅悵望南樓日已遠  
何由共飲殷勤看一年月色今夜好去逐青青河

畔草辜負當時置驛情頽然歸向墻東老從此長  
爲原憲貧仲宣何處更依人客程如黛千峰出幸  
有同行慢亭客

十六夜舟泊梅州城外同藍公漪李際青  
朱立雲月下小酌疊前韻

艤舟回望孤城高城頭顧免生彩毫一尊相屬蓬  
底坐喧喧萬鼓鳴秋濤閩中佳士有二子相與同  
渡龍川水傾情倒意恣劇談玉屑霏霏坐中起愛  
君詩句美如丸只愁道路羊腸盤此地雖云長似  
夏坐久未敵清輝寒在粵何殊與在汴月色初無

古今變四人文字飲亦歡豈必花枝共歌板自慙  
小戶戰不前酒兵出竒竒益堅良辰良會二難併  
那惜醕酌啣杯看今夜猶如昨夜好滿地霜華不  
殺草莫嫌粗糲腐儒餐難得人生醉鄉老載將風  
月未爲貧歸去真成萬里人須臾金烏又東出歎  
息光陰如過客

泊水口

青山江上月輪秋夾岸修篁伴客愁夢裏頻呼舟  
子問西行幾日見羅浮

過白鶴峰蘇公故居

先生之循州寓居東西徙緣盡逝輒隨斯言味誠  
旨及買白鶴峰謂將老于此和陶移居詩其意固  
深喜旣賞江山佳宜乎春睡美詩爲忘者聞被命  
赴儋耳地亦重以人迄今未頽圯我來訪故居慨  
慕何能已齋以無邪名又云無思起無邪與無思  
先生聞道矣

西湖四首

西子湖頭一溯洄錦峰繡嶺自天開豐湖不減明  
湖勝合有坡公此地來  
山水坡公興頗濃此間林壑有千重如何不便誅



茅住却占城頭白鶴峰

青山環合鎖烟霞秋月春風景最賒尤愛湖心閒  
繫艇繞堤不斷四時花

千頃玻璃落照紅打魚舩子白蘋風石橋南畔孤  
亭上坐看樓臺似鏡中

望羅浮用東坡同子過遊羅浮韻

迢迢高處連玉京舟行過此方雞鳴時從夢中驚  
坐起石樓飛出跋烏明洞天福地恨不至至豈痼  
疾忘平生無錢未得買山住心懷子真谷口耕苟  
能冥棲以味道何必壽夭論殤彭自笑癡頑飽藜

覓老來身健無官輕臨風愛學山頭嘯衝雪好爲  
驢背吟嶺南流落五千里未見黃色上天庭此間  
名勝誓訪遍搜竒時覽山海經羅浮安得到其上  
紀游擬勒燕然銘貨殖久陋陶朱公任俠亦厭樓  
君卿會尋五岳縱遊屐況余婚嫁畢向平

重陽前一日登鎮海樓

無端來作五羊遊節近登高上此樓海氣溟濛山  
遶郭天風浩蕩客悲秋飄蓬且喜雲生屐簪菊應  
羞雪滿頭鄉國茫茫何處是珠江一片夕陽愁

九日薛孝穆招同甯澳公陳端木湯儀吉

劉管分葉蒼崖朱立雲吳方來屈天之  
飲屈氏騷聖樓分得歸字

樓外峰明坐翠微獨醒人遠尚何依非關好飲同  
黃酒自爲論文欵竹扉嘯咏且隨羣彥集歡娛偏  
與故鄉違羊城未減龍山勝暫插黃花不憶歸

屈翁山招同薛孝穆飲古丈夫洞草堂

秋晚炎州景亦清入門黃葉映簷明草堂舊是盧

鴻住竹徑新看蔣詡成堂新修整十六年來重此會未已

春曾見訪已十六年矣五千里外送將行昔孝穆將之乳源酒闌聚散無窮

感簾卷如鈎月又生

### 送孝穆赴乳源幕疊前韻

西風吹葉助淒清把酒離堂蠟焰明楚客已同餐

菊慣向寓屈氏騷聖樓虞卿真見著書成所選明文在方梓成舟從白雁

秋中去人在青山畫裏行歸亦道經韶石下何時

涿水訪先生

### 讀家惠州南區詩志美并以留別

吾宗賢太守示我詩一卷展卷光陸離讀之目爲

眩天然麗且妍出水芙蓉茜何來照乘珠置彼盤

中轉千言翻水成而勝百錘鍊詞場角雌雄孰敢

不低面分符嶺南來更得交羣彥論文日夕偕數

以詩酣戰嘴距誇擅場才名盛黃綃泛舟西湖中  
花月張清宴羅浮古洞天登覽題詩偏人盡稱風  
流坡公今再見客遊越王臺一見即相善但言棣  
萼歡不鄙荷衣賤烏鵲悵無依窮途藉之遣近憂  
庾公塵輒舉西風扇誰爲魯仲連與射聊城箭方  
曳侯門裾思萼返鄉縣公意故拳拳余心亦眷眷  
去矣乘班騅酒闌淚如霰

子日亭歌

羅浮高高凌紫氛一峰絕頂名飛雲浮山之巔此  
峰是石樓並峙東西分一陽旋轉生于子有聲如

雷日輪起燭龍飛來若木枝最近南溟他莫比雞  
鳴萬里光曛曛海天浴日玻璃紅宜有飛薨建其  
上蒼茫下瞰蛟人宮鐵橋石柱人不至舊有精藍  
今亦毀終宵露宿常苦寒急與誅茅成福地惠陽  
太守吾宗賢翩翩文藻人中仙剖符相傍葛洪井  
餐霞欲拍洪崖肩突兀爲亭當絕巘梯空締構如  
斯罕以月以時皆以子吹灰恰中黃鍾管茲地風  
流屬大蘇只今五馬何曾殊袖中攜得生花筆登  
此遙瞻三足烏四百峰連與亭稱五城十二樓爭  
勝時時知有鬱儀朝羽蓋霓旌往來盛岱宗日觀

未云竒更有雄文以敵之垂諸琬琰傳百世字青  
石赤岫嶁碑

魚缸歌

炎州九月初涼夕吾兄張筵宴賓客樽罍珍重出  
魚缸傾以醑醺如琥珀四尾魚從缸面浮生來鱗  
鬣丹砂色得酒渾如戲水頻銀塘荷動波搖碧所  
怪缸盛涓瀝微相忘遂若江湖適倘許宅時化北  
溟圖南會展搏風翼徑寸無過白小同雙眼依然  
射波赤豈有任公釣此中鈎餌欲施施不得此缸  
製自茂陵年窰口官哥許並傳瑩白無瑕温且澤

不殊美玉生藍田縱未如鯨百川吸儘堪一盞合  
自然吾兄本是玉皇吏謫居此地真神仙風流太  
守文章伯爲亭子日羅浮顛況求長生得真訣內  
景熟讀黃庭篇識得杯中有深味何辭治郡移酒  
泉什襲藏來十年久光華照耀驚四筵酒半嗚嗚  
動城角主賓座上談諧作簾卷輕風瑟瑟來金波  
滿地榕陰薄嶺外芳醪倒荔枝尤勝京師飲桑落  
酌焉不竭亦不盈小器妙能成大壑莊子大壑之爲物也注焉而不滿酌  
焉而不竭非惟於酒識聖賢兼得觀魚殊不惡騰波豈望  
如鯉神顧轍應無憂鮒涸從今不復嘆無魚將欲

因之悟魚躍彷彿身在濠梁遊非魚寧不知魚樂  
舟中望羚羊山寺

舟未入峽來已聞山寺勝屢欲一停撓諸峰惜將  
暝天地至南溟扶輿氣方盛峽臨江益高江束峽  
逾橫乃知造化竒故使二者競招提在山腰清絕  
塵氛屏泉飛曲徑紅花發閒房靚薄暮倚船窓冷  
泠響清磬攀登雖未能領略殊無剩明遊七星岩  
蠟屐窮幽興

閱江樓

雄鎮天南是此州飛甍插漢有高樓山連象郡橫

空起水滙扶胥入海流已見七星簷外落全疑百  
粵檻中收客心倍覺思歸切望斷梅花庾嶺頭

七星岩石室

天上招搖隕爲石芙蓉影浸澄湖碧若爲碁布若  
珠聯遙望白榆何歷歷中央屹立是崧臺下有石  
室生虛白果然靈境百神觴信是神工五丁闢變  
幻看成鳥獸形轟鏗時作鼓鐘擊杭州飛來或相  
似縹緲仙都遜莫敵今晨幸得同躋攀碌碌塵中  
慰于役嗟哉遠客瘴癘鄉欲訪仙跡殊茫茫葛洪  
井旣不可到李邕記亦焉能詳昔曾夢遊至天姥

今豈長流來夜郎勝處必窮靈運屐洞中待叱初  
平羊更乘餘興東峰去鵠立通明侍玉皇

東峰最高處爲玉皇閣

### 屏風巖

路指霄關上崎嶇磴道重雲中遙見闕林杪忽聞  
鐘川濶滅飛鳥天清明遠峰更餘塵外賞醉石蘚  
花封

### 梁藥亭太史以詩送行賦荅

君家同年唐實與吳元嘗謂與君堪鼎足一誇八  
斗子建才一恃便便孝先腹先有同里屈翁與陳

元世稱嶺外三詩人旗鼓相雄不相下筆端變化  
各有神風格推君更超越河源探自崑崙發糟粕  
盡去精髓存斯誠畫馬獨畫骨自從秋仲之五羊  
摠衣長跪升君堂古心古貌世罕有真氣戶牖驚  
非常吐握于今棄如土惟君好士心良苦自顧無  
才非仲宣幾蒙書籍中郎與扁舟歲暮別將歸楚  
岸霜清木葉稀深荷高情贈長句發函滿紙皆珠  
璣竒珍并惠青花硯龍尾鳳味何足羨要余時吐  
錦繡腸辜負相期汗顏面雙攜歸向五湖邊會有  
光芒夜燭天每誦君詩感君意時時夢繞羅浮巔

看君健飭髮如漆豈得雲霄忘捧日謝公不久卧  
東山端爲蒼生終一出菊黃時節在京都知必相  
逢唐與吳花下清樽如念我頻將書札到潛夫

畱別屈翁山

自我客五羊適君讀禮時所以別君還贈行獨無  
詩君雖未有詩吾寧不傷離與君定交始乃在婁  
江湄星霜屢更易十六年于茲上堂敘夙昔執手  
各涕洟顏面雖老蒼猶然舊丰儀爲詩等身富披  
讀驚恢竒黃鐘大鏞在安用餘響爲其文逼秦漢  
閩奧靡弗窺問所從得力薛子孝穆相切劘詩文並

不朽允矣真吾師嶺南臘月盡桃李皆華滋歸帆  
挂江滄行矣增淒其勿以老自歎歎老則業墮勿  
以窮自嗟嗟窮則志卑勉哉懷祖德名必儒林垂  
耻效兒女態千秋以爲期

荅陳元孝贈別次原韻

少微嶺外有光輝纔得相逢又別歸留客君曾開  
竹徑還家我自掩荆扉人離荔浦潮來遠天向梅  
關鴈到稀非是越臺輕一去五湖烟水夢漁磯

除夕

老大離鄉半載餘故園鴻雁少來書梅花折得無

由寄寂寞天涯又歲除

蘆中集卷九 終

蘆中集卷十

起乙亥正月  
盡丁丑六月

飛來寺

太倉王攄虹友著

飛來山寺古門外泊歸船瀑掛巖頭樹雲封峽口  
天滄桑梁殿在殿為梁武帝時物風雨粵裝偏安得長棲止  
同參六祖禪

將至英德書所見

孤城在望中半月雨兼風天自新年異春非故國  
同侵袍汀草綠含笑野桃紅物候驚偏早彌增歎  
轉蓬



觀音巖

迷津不可渡聊一泛輕輪真是水精域乍來甘露  
門瀑雷奔壑衆花雨滴衣繫架木爲梯峻燃燈照  
洞昏霞城時啓閉雲路得攀援蓮葉形中擘鰲身  
勢上騫虛無臨駭浪空迴射朝暎掃地稀人跡焚  
香淨客魂鳴多巢樹鶴飲有緹藤猿蘿綴僧窓古  
山明佛火尊將從叅水月還復證風旛初地偶相  
引智珠難與論砂無成飭候劍有刻舟痕謬想除  
諸妄終求會一源心由無住得道在不言存何日  
辭塵網南來究本元

蠟燭峰

何處光明燭移來客舫前九枝疑照夜一柱忽擎  
天出霧孤標迴生雲衆壑連江心幽怪伏不必用  
犀燃

武溪水

我愛武溪水潺潺若送行偶因經此路還復想南  
征寂寞雲臺畫流傳銅柱名跼鳶雖不見愁殺鷓  
鴒聲

南華寺

吾生遠在東海涯問禪每欲之南華五羊歸客五

千里到此將一停輕艤六祖得法破頭寺一偈妙  
合傳袈裟南行追者至大庾錫端泉湧咸驚嗟後  
來兩宗盛南北道實由此匪由他靈照之塔傳百  
禩其名賜自唐元和云是禪林冠嶺外柳子作記  
言非誇乃知水香曹溪口竺僧有言誠不訛滄桑  
屢更歷久遠寶地允爲神護呵豈無異人相繼出  
演法或可聞三車如何風雨阻登涉道心空銳成  
蹉跎世人大事都未曉算數不啻恒河沙我亦緣  
慳願莫遂白頭萬里徒奔波歸向蒲團覓清淨永  
無滯室從登伽

張文獻公祠

祠堂丞相鐵爲胎瞻拜空餘海燕哀只道主由金  
鏡致豈知兵爲玉環來文章自昔傳徐碣香火常  
新傍舜臺風度依然憑想像停舟一薦渚蘋回

韶石

偶經韶石下遂上韶石遊歸然見雙闕烟靄空中  
浮怪石莽森列波心若沉牛虞帝昔南巡九成奏  
上頭人器今兩亡遺跡無復留遙望蒼梧雲九疑  
愁更愁相傳帝子悲哀怨空千秋張樂洞庭野荒  
渺知難求惟茲石不朽痛類攀髯不近爲憂勤主

淪沒傷神州重華去不返雲水空悠悠古今同一  
慨淚落誰能收

### 大庾嶺

五嶺連綿始大庾險絕山川粵門戶遙瞻一髮是  
中原江楚茫茫見烟樹當時天下爭叛秦尉佗遂  
得有斯土使粵尋用陸生言稱臣不煩兵力取丞  
相呂嘉復爲亂終遣樓船下橫浦其他竊據如僞  
劉奴僕之才安足數昨者煽亂自滇閩成擒笑彼  
一駭豎只今天地皆廓清南朔東西不用武畏途  
應免客魂驚微覺山行犖确苦唐開南道稍平夷

與北懸殊便行旅猶嫌上下筋骨勞頭白攀登氣  
如縷哀猿落日不堪聽天半梅關似建瓴明日扁  
舟江上去雲濤何處望南溟

### 至南安

庾關橫浦路非賒舟近孤城泊晚沙黃鳥一樽江  
上酒青山兩岸雨中花方春物候如將夏度嶺人  
情似到家從此故園歸去好只愁尚隔楚天遐

### 贈臨江李述齋太守二首

一麾出守自鑿坡曾向花磚視草過經國何妨爲  
郡始致君要在澤民多最令吏懼烏啣肉屢有人

言虎渡河行見 朝廷資補袞政成襦袴不須歌  
少日曾充觀國賓西京文字冠東秦共欽才筆班  
揚妙獨忝通門孔李親書號墨庄知地勝用宋劉式事  
蓋郡人也  
山看玉筍惜官貧自憐結襪王生在記別金臺二  
十春丙辰初登第  
即晤於京邸

### 滕王閣

巍巍帝子閣乃在江之濱平生想慕此道遠無由  
親昨歲過其下夙心仍未伸去爲嶺南客夢遶西  
江頻回艫上元後到日將殘春飛蕩插霄漢照耀  
城隅新西山見堆皺入戶青嶙峋江流橫匹練漲

涿春無垠諸藩昔煽亂鄰壤皆烟塵斯閣廢已久  
未宜侈前人規模過宏麗誰念蒼生貧子安甫弱  
冠來作閩公賓昌黎刺屬邑造觀終無因登臨偶  
然遂蓬梗成悲辛挂帆待明發悵望同參辰

### 鐵柱宮

歸客章江泛烟艇停橈遂訪玄都境鐵柱生寒老  
蛟泣轆轤無聲閉金井肅步樞衣拜玉墀香爐烟  
暗螭頭影弟子東西列鴈行冕旒秀發尊無並丹  
經獨受領仙班孝道初從謚姆傳建立壇靖七十  
所羣妖屏跡莫敢前奸雄興謀終必敗識垂後世

如其言功成全家上昇去淮王雞犬咸登仙所憂  
今日人心陷舉世滔滔盡昏墊縱橫餘孽滿江湖  
何處還求斬蛟劍

重見靈山

篠箬塘邊再問津遙從鷓首見嶙峋烟雲百態猶  
前度面目重看是故人爲客漸知吳地近還家休  
歎粵裝貧屏風九疊匡廬似不羨揚帆彭蠡濱

春盡

柳自依依草自芳看他別我去堂堂最憐情緒如  
中酒翻覺風光稱悼亡

先一日爲  
凶室忌辰

轉眼已驚成蝶夢傷

腸心可忍聽鶯簧宵來獨背殘缸卧追憶穠華黯斷

黃忍菴宮贊齋中藤花盛開招集同人讌

賞次忍翁韻

不圖良會在花前久客初歸嶺外天荀令薰爐香  
滿室石家步障錦生烟故應縱飲緣文字難得清  
遊更管絃同是東山高卧處勝他碧樹與紅泉

哭玉峰司寇

公已遊泉下余方度嶺頭

于廣州得  
公函問

曾聞召宣室何

遽哭崖州鈞黨名逾重文章道最優士林今失望

廣厦庇應休

食楊梅追恨未得食荔支用東坡荔支歎

韻

飽啖荔支心已灰山中節物驚相催君家家果五月熟冰盤滿薦虬珠來荔支遙遙出南海此物近自銅坑採流落天涯惜與疎衣染洛塵先幾載荔支去年客廣州味劣於閩猶勝涪如何未得嘗一顆豈非辜負羊城游在昔梯航貢天子死亡半屬民瘡痍聖人豈貴難得乎嘉禾九穗方稱瑞章江歸時蘭茁芽扁舟滿載興交加到日鄉園櫻筍好

兩前兼得烹新茶今朝美品更食此荔支相較寧殊耶追思還有可恨事大庾嶺上無梅花

壽京江張太夫人八袞二首

朱顏綠髮少如童鍾郝爭傳是女宗邵氏一枝高折桂荀家若箇不稱龍榮非晉世誇門閥儉本唐風陋鼎鐘鸞鵲啣來天上詔主恩重叠紫泥封清時久已頌明良歸美爲霖在義方盡道相公能問喘遂令天子致垂裳西池讌列簪纓滿南極星臨翟第光家慶國恩難罄述平生幸得客安昌送徐霆發學博之任淮安

徐君風流世所稀揮毫落紙皆珠璣漢皇豈乏凌  
雲賞蜀道無由駟馬歸寂寞才名三十載芙蓉秋  
冷無人采上書未奪錦袍新漉酒空餘葛巾在荏  
苒風塵歲月徂澆花養竹城南隅共誰狂舞提如  
意祇自哀歌缺唾壺嗟今廣文飯不足長日堆盤  
惟苜蓿世重傳經老伏生人推作賦今枚叔森森  
烟波甓社連送君遙上楚江船一時淮海人文變  
千載蘇湖教澤傳嗚呼赫赫先公業青史黨人光  
奕葉憶曾殿檻折朱雲幸未酒家藏李燮物換星  
移五十霜故宮離黍恨茫茫南國競稱才子句西  
臺莫問直臣章從此金門必通籍 至尊屢召虛  
前席休嫌蔡澤尚無媒不見馬周嘗作客變化鯤  
鵬會有期分攜故舊不勝悲往來爲是求羊侶腸  
斷淮南木落時

招杜讓水及諸同人集獅子林梅花下用

東坡和秦太虛韻

孤山萬樹惜已槁何處金樽堪一倒去年大庾嶺  
頭行不見此花空懊惱招邀勝侶集精藍入戶皚  
皚放偏早心清因得妙香聞看自禪枝分外好吟  
壇旗鼓各爭雄若箇千軍筆能掃就中杜老尤崛

哥和蘇似蘇風格老是日詩讓水最佳不來花下日留連無  
乃徒芳惜瑤草春寒欲雨未盡歡明更攜壺賞晴  
昊

吟社言懷

生平無寸長所事惟雕蟲少壯忽已過衰頽成老  
翁往者樹赤幟實惟祭酒公蔚邨與之匹兩師藉  
磨礱石交有許子尤以窮而工饑駟出門去不丁  
京華中新城感說項拙詩為家阮亭所賞大雅欽吾宗未幾之  
嶺表三子才力同謂藥亭翁山元孝也各各臻閩奧要皆出羣  
雄倦遊時已甚垂橐還牆東暫得勞筋息蕭條四

壁空稍喜求羊侶竹間時過從招我文字飲故人

有文通初位哥兵方厚集獨出偏師攻自哂不自量

何殊筵撞鐘世多市道交雅會不常有詩學日榛

蕪雷鳴在瓦缶久欲共討論四方強餬口在陳苟

無憂此志終不負嗟哉典驕驕衣敝露兩肘焦桐

痛絕絃喪我孟光婦有兒皆景升狔犬安足取暮

齒為歡娛庶幾仗好友白日急西奔勝情事詩酒

或弄月吟風或烹葵翦韭茲樂偶然遂南面肯易

否世事如浮雲須臾變蒼狗長安十丈塵能使素

衣垢營營何益哉故轍且須守寧與鹿豕遊毋為



牛馬走

登鄒裕來秋水閣次壁間韻

一片晴湖萬頃烟樓居眺望儼登仙賞心豈待雨  
方好閣在烟雨樓旁舉目況多春可憐零落鶯花寒食後蒼  
茫葭菼夕陽邊相思他日堪乘興未肯輕回訪戴  
船

訪錢遵王留飲牡丹花下

谷口相尋處青山繞屋斜多君能醉客留我共看  
花爛熳金樽倒低迷錦幄遮白頭燈影裏自覺負  
繁華

歸舟過巴城湖

連宵樽酒醉花間又向湖濱放櫂還朋好未疎緣  
地近登臨猶愛爲身閒夕陽微下烏邊樹春水遠  
浮雲外山書著窮愁嗟已老從今急合掩柴關

割股篇爲趙松一賦

反唇相稽世恒有婦姑之間動多咎乃知孝道人  
所難誰激頰波趙家婦姑時二豎苦相纏祈代呼  
號真可憐以誠格天天爲格盧扁不用沉疴痊偷  
將霜刃自割股血肉淋漓和藥煮豈惟救姑姑再  
生昔未于歸先救父人間久已三綱淪可以風世

君夫人温嶠功雖在王室絕裾未免遺其親我願  
以之勗臣子勉為忠孝皆如此嗚呼療父復療姑  
大孝千秋耀青史

讀孫凱似太史未申集集中七用東坡繫  
獄遺子由韻即次韻四首

獄解如回黍谷春歸來猶剩苦吟身正憐阮籍方  
窮路誰信曾參竟殺人無罪豈應罹密網有寃還  
與問明神李義山詩明神司過豈能寃升沉不用君平卜讀易悠然  
悟昔因

霜飛六月正淒淒時命能安不厭低儘有達觀緣

失馬終懷壯志在聞雞功名偏躋題橋客魂夢頻  
牽織錦妻好趨玉堂揮翰手歸評風月五湖西

南冠憔悴再經春欲殺還存未殺身李白幸能寬  
聖世魯連豈易望時人 國恩憶却渾如夢詩

筆拈來信有神鸚鵡才高誰得似折君官職不無  
因

何處君門望轉淒終宵貫索向人低驚回噩夢愁  
談虎留得閒身許祝雞歷齒勝他王霸子齊眉負  
我孟光妻不知誰貸監河粟馬首雲生太華西時謀

秦中  
輸贖之

長夏小齋雅集用杜夏日李公見訪韻

頻年走南北汗漫雲山遊依人竟何益王粲悲登樓  
緬懷竹林會渺矣不可求開軒宴佳客爲樂有是不正聲  
久衰歇日下江河流諸君陶謝手力挽垂千秋蟾光隱  
簷細荷氣侵衣稠時方張火傘六月虛堂幽興來倒醺醪  
風雅樽前留此事兒曹繼安知非仲謀

是日昭被設席戲云

讀宋孤臣泣血錄四首

議和和議迄無成自號竒兵不用兵北狩當時先示兆紛紛大雪獨青城

肉袒君臣總厚顏金人意只在津般可憐良嶽窮民力詔許樵蘇萬歲山  
哀詞空自憶君王元夕詩傳著作郎却怪賊臣如檜者也曾拒命立邦昌  
西巡修謁不堪論南渡江山半壁存可惜中興頒大赦在原問寢是虛言

哭芝廬兄

鴒原感聚散轉展悲未央與兄相依久青鬢今成霜  
中惟就祿養稍隔關河長餘皆形影共焉有離羣傷自懼安仁戚寧處恒不遑別兄出門去餬口

之四方姜被久不溫倦遊始還鄉從此墳與箎謂  
可無參商豈赴修文召沉疴遂膏盲兄也龍媒姿  
天衢早騰驤同時策名者袞袞登廟堂守貞獨不  
字高卧終柴桑有子樹佳政 璽書下徵黃直言  
動丹陛汲黯君能匡子孫濟濟盛國寶皆琳瑯臨  
川述祖德晉室賴以康歐陽本少孤顯親表瀧岡  
後人苟能賢寧患名弗彰鉢心而劇目平日爲文  
章今猶傳萬口誰曰風流亡往事忍追述憑棺淚  
浪浪庶幾仗史筆永發泉壤光

次和忍翁除夕元旦韻二首

守歲頻燒臘炬紅夜闌顧影笑冬烘窮來那得文  
能送愁在端非酒可攻回首鴿原方戚戚驚心駒  
隙故忡忡膝前猶記斑衣舞彈指兒孫又喚翁  
屋頭星斗已闌干爆竹聲喧夢未安猶有薄田供  
歲酒終輸紈袴誤儒冠依棲笑比烏三匝才了愁  
經路七盤漫對青銅悲老大花枝拚向霧中看

和忍翁見予兄弟和詩疊前韻二首

春寒常擁一爐紅花氣晴窓煖漸烘閒有篇章成  
漫興老無嗜慾省交攻中年哀樂形先悴暮景飛  
騰意暗忡幸得把君詩過日柵邊甘作祝雞翁

寸祿生平肯漫干布衣蔬食幸能安  
畦荒課僕先除草客至呼兒急  
整冠避世待營新土室感時休  
問內金盤曲高慙媿難爲和  
九十春光好共看

和忍翁卧疾用東坡和子由病酒肺疾韻

京華昔倦遊欲返牆東卧  
長途跨蹇驢歷歷關河  
過尋爲瘴海行仰見飛鳶墮  
垂橐甫歸來孔融邀  
入坐憑將一餉歡以救饑  
駟餓朱藤瓔珞垂月漏  
花陰破頻年歲不登汗菜  
率未播乞米且無粥釀  
酒安得粳乃知家食艱  
翻願爲人佐故里難久居  
馳駟悲老大擬辦入洛裝  
恨無才賦磨忽蒙示佳

什努力相酬和嘴距焉敢誇  
庶幾慰困珂幹回微  
先生茲事棄則那舊雨已  
蕭條十人存六箇予亦  
厠吟壇當爲糝糠簸肺病  
知偶然筆鋒未嘗挫硤  
硤與玉同辱等坐豆莖斯  
文誰責歟雖老自勤課  
嗟我阿兄亡乞君賦哀些

次和忍翁小樓韻二首

不將百尺並元龍病起經旬坐  
卧中未得勸酬同  
酒盞聊憑來往有詩筒等身著  
述今吾在回首觚  
稜昔夢空春早晴窓宜炙背  
明朝二十四番風  
京洛緇塵十載忙此中習靜似  
僧廊茶香午榻穿

書幌花影晨窓上筆床投老心情安寂寞起衰文字出尋常流傳僞體今誰療還仗先生肘後方

和溪公初春下浣隨菴兄造訪見寄四首  
吾兄真靜者白社興方新扶杖來禪室吟詩坐早春竹陰遮戶密梅蕊亞枝勻相對忘言慣心空自不嗔

見說城南路幽居勝事偏烹茶殘竈火洗鉢小池泉竹下門常掩松間榻正懸清談多道氣禮數喜能捐

歲月驚如駛新年草色新林泉容懶性瓢笠伴吟

身幽處堪攜屐狂來欲墊巾巡簷將索笑又放一枝春

出世心無事茅齋可賦詩忍饑君已慣入道我何遲微妙誠難矣風流孰過之家聲慚步武勉爾學爲箕

和忍翁見實君亦史憲尹和詩疊前韻二

首

梅意經寒漸吐紅晨曦憑向小窓烘時窮未要憂金躍才薄何能藉石攻閒話漁樵頻色喜驚聞戰伐只心忡此生蔗境知難望六十先成鶴髮翁

紛紛詩戰競稱干撚斷吟髭未得安跡寄僧扉餘  
白氍情甘野服自黃冠記野夫黃冠有人歸卧湖名鏡何  
處幽棲谷是盤屬和慙余才已竭諸公便腹借將  
看

和忍翁見位初台臣歷所和詩疊前韻二

首

微醺亦可助顏紅豈及南榮暖日烘  
轉徑烏催春意醒含苞花借雨聲攻身將  
遯世何妨懶心但忘機自不忡  
今我已知非故我蕭然禪榻一衰翁  
覆雨翻雲總不干生涯惟覺苦吟安  
恒饑待乞真

卿米粗適聊爲子夏冠厨有青絲供  
晚酌網無銀鬣薦春盤腐儒衰晚難  
言況詩罷先生一笑看

賦得春寒花較遲十韻

弧建方中候穠華悵後期風猶侵雪幌  
月每照冰池代謝寧無意陰陽各有時  
如何成錯迕偏復嘆淒其庾賦枯雖異  
隋宮剪却宜蕭條煨榾柮寂寞掩茅茨  
與我同雌伏憐他亦數竒天心那可測  
物候已潛移未覩陽和轉將爲燮理疑  
金鈴繫何處且待日遲遲

和忍翁見憲尹及余和詩疊前韻

先生懶出門齋閣經旬卧誦詩企無邪學易期寡  
過老年恒兀兀祇恐修名墮自古爲文辭空疎病  
所坐誰能扛龍文而忍翳桑餓腹筭苟便便吐詞  
鬼膽破治田亦如之農夫貴勤播取麥更取禾種  
杭還種粳先生官禁林史筆董狐佐及爲二疏歸  
身退名益大追憶竹林遊雙丸疾如磨吟社角雄  
雌曲高鮮能和衰晚罹百憂嗟余實坎坷強作蒼  
蠅鳴慙汗真無那方今推老成以外餘幾箇碧海  
掣鯨魚鼃鼃窟爲簸幸而斯人存衰氣未頽挫斬  
伐專訶壇錯薪理須莖大匠無棄材懦頑亦可課

願言操杖屨以待君閒些

花朝溪公書至雪阻不得造訪賦寄

尺素煩將慰寂寥宵來六出正紛飄已同禪侶爲  
詩侶誰遣花朝變雪朝煮茗清談非造次衝泥緩  
步亦逍遙自憐衰疾過從懶須盼晴光上柳條

花朝

已是花朝至春寒尚未輕凍枝風折短新水雪消  
生展卷常多睡開樽且細傾老人憂國意惟願罷  
西征

寄楊人菴總戎



東秦原重地年少位通侯 帝念家聲舊人知將  
略優六州尊鎖鑰萬竈擁貔貅玉潤君難弟珠江  
我昔遊過逢叨禮數姻婭結綢繆說項周旋屢依  
劉意氣投登壇聞有喜乞米得無憂鼓角三軍肅  
風雲一劍收邊陲烽火接沙漠 乘輿留封豕殲  
猶突妖星掃即休定降日逐衆必斬郅支頭將帥  
銘功會英雄用武秋壯猷寧境內餘勇震遐陬勦  
力扶 王室殫心佐 廟謀韓彭方屬漢申甫恰  
生周蔡戟勞瞻望關山恨阻修亭衢看翥鳳瀕海  
狎盟鷗何日軍機暇追陪上庾樓

春雪疊前韻

入春凡幾度如掌下來輕寒更非時至光仍滿徑  
生水添魚笱動枝重鳥巢傾未必農占喜將何責  
地征

春分前一日雪

每歲春分候花飛片片斜今年何寂寞只有雪如  
花肅殺關兵氣蹉跎到物華廟堂勤問喘應動相  
公嗟

溪公見訪不值賦寄

只緣中散懶未到贊公房步履東風裏聞君過草

堂論詩心自好問法道難忘慙愧門題鳳吟成早  
寄將

過訪溪公次日以詩見寄次韻荅之

雪消霽景新微暖禽聲起閒步訪精廬城南白雲  
裏足音空谷聞靜者心仍喜燕坐竹房幽清談得  
妙理尤愛讀新詩湛然語不綺如聆清夜鐘一警  
春睡美方諸古詩僧畫徹安能擬詩與道根源冥  
觀見所以世或病非儒長城我將倚明日來東林  
花香滿屐齒

西征蕩平歌

我 皇撻伐神武章阪泉軒德垂無疆悉主悉臣  
四海一是何醜類猶鴟張維茲冒頓誇強大蛇豕  
橫行沙漠外時於與國恣憑陵并抗天威來犯塞  
蒐簡三軍出羽林 六飛戰陣必親臨興師今不  
由庭議掃穴功惟決 聖心如雲士馬烏蘭北飽  
騰深入憂難得草茁泉生助有神乃知天佑非人  
力片甲沙場敗不存狡謀兔脫欲西奔預察機牙  
設竒伏遊魂釜底無逃門破亡或可收餘燼一蹶  
誰知難再振飲鳩終歸革裹尸捷書已報樓蘭信  
殲止其魁遂息兵尤能柔遠在推誠凱歌合奏平

淮雅始信功由斷乃成君長紛紛散谿谷咸來款  
塞稱臣服唐宗未克安市回漢祖且受平城辱赫  
濯如斯古所難今當獻號似貞觀東西南朔皆王  
土一統華戎天可汗後先戡亂勲猷盛 天戈屢  
埽妖氛淨無諸成擒吳淠誅田橫海島皆歸命出  
塞更封狼居胥築將京觀清邊隅放牛歸馬自茲  
始閭閻擊壤同康衢破陣樂章奏 郊 廟師旋  
特以成功告 一人有慶致河清億兆沾濡均覆  
燾燁赫軍聲動九垓舞階干羽有苗來大小臣工  
競颺拜共球萬國明堂開

幽居

衰年厭塵事懶性愛幽居倚樹時聽鳥臨流或釣  
魚枕吟未穩句鄰借欲抄書豈必窮能送吾知樂  
有餘

題龔敬立意止齋次原韻二首

不聞鵝鴨鬧柴荆深樹時時鳥弄聲佳客爲誰花  
逕掃詩人從此草堂名窓虛揮翰雲生硯屋小烹  
泉雪沸鐺舍北舍南閑步好知君來往籜冠輕  
爲愛閒居此卜居屈伸龍蠖事皆虛詎如張老言  
成室聊比陶公詠結廬柳岸晚風臨水釣藥畦春

雨荷蓑鋤童時出入分明記牛角曾看挂漢書

聞吳商志將之秦中賦寄

山河秦地古來稱君到咸原試一登知有蒼梧無限淚西風潛灑漢諸陵

題朱立雲詩卷

我愛溪南老風流迥不羣古來文苑傳三絕孰如君箬笠沾村雨芒鞋踏嶺雲憶曾同客粵吟罷曉鐘聞

和樂天自戲心問身身報心心重答身三

首

曾經出塞馬蹄穿歸老江南水竹邊不是息機甘抱甕北牕那便得高眠最是人情險太行關河跋履豈辭忙休嗤我作勞薪慣第一期君學坐忘人世紛紛盡觸蠻關情名利豈能閒平生遺得君安否未有移文誚北山

國

國立中央圖書館藏

唐詩集卷十

三

